

VENDIM
Nr. 8/2014

**PËR NGRITJEN E KOMISIONIT HETIMOR TË KUVENDIT PËR TË KONTROLLUAR
ZBATIMIN E LEGJISLACIONIT NË FUQI GJATË PROCESIT TË LËVIZJEVE TË BURIMEVE
NJERËZORE TË POLICISË SË SHQIPËRISË**

Në mbështetje të neneve 7, 77 dhe 78 të Kushtetutës, të neneve 5, 6, 8 e 9 të ligjit nr. 8891, datë 2.5.2002, "Për organizimin dhe funksionimin e komisioneve hetimore të Kuvendit", si dhe të nenit 25 të Rregullores së Kuvendit, me propozimin e një grupi deputetësh të Grupit Parlamentar të Partisë Demokratike,

KUVENDI
I REPUBLIKËS SË SHQIPËRISË

VENDOSI:

I. Ngritjen e komisionit hetimor të Kuvendit për shqyrtimin e kërkesës së një grupi prej 36 deputetësh të Grupit Parlamentar të Partisë Demokratike.

II. Objekti i punës së komisionit hetimor është:

Kontrolli i zbatimit të legjislacionit në fuqi për procesin e lëvizjeve të burimeve njerëzore në Policinë e Shtetit, për periudhën 15 shtator 2013 - 31 janar 2014, përfshirë largimet, transferimet dhe punësimet e reja në polici, me qëllim për të njohur e verifikuar tërësisht këtë proces dhe pasojat e sjella në garantimin e sigurisë publike.

III. Komisioni ka të drejtë të hetojë dhe të bëjë transparencë të plotë për çdo çështje që përfshihet në objektin e punës së tij, në përputhje me parimet kushtetuese, veçanërisht parimin e ndarjes dhe balancimit të pushteteve, si dhe duke respektuar dhe duke mos mbivendosur kompetencat e organeve të drejtësisë.

IV. Komisioni hetimor, i ngritur sipas këtij vendimi, bashkë me raportin përfundimtar, i paraqet Kuvendit në seancë plenare rekomandime në lidhje me nxjerrjen e përgjegjësive, përfshirë ato institucionale, ndryshime apo miratime ligjesh, lidhur me Policinë e Shtetit.

V. Komisioni hetimor përbëhet nga 15 deputetë, 8 nga mazhoranca e 7 nga opozita. Emrat e anëtarëve të komisionit përcaktohen me vendim të Kuvendit.

VI. Komisioni e ushtron veprimtarinë e tij për një afat 2-mujor nga miratimi i këtij vendimi.

VII. Ngarkohet Kryetari i Kuvendit që menjëherë të caktojë mjediset dhe mjetet e punës së komisionit, si dhe personelin e nevojshëm, duke vënë në dispozicion edhe ekspertë juristë.

VIII. Ngarkohet Sekretari i Përgjithshëm i Kuvendit që të marrë masa për zbatimin e vendimit të Kuvendit dhe të urdhrave të Kryetarit të Kuvendit, për mbarëvajtjen e punës së komisionit, si dhe krijimin e kushteve të nevojshme logjistike për veprimtarinë normale të tij.

IX. Ky vendim hyn në fuqi menjëherë.

KRYETARI
Ilir Meta

Miraturar në datën 6.2.2014